
# عبد العزيز بندق

# من بلاد العرقسوس

شعـر

صدرت الطبعة الأولى في يناير 2019



#### بطاقة الكتاب

\_\_\_\_\_

عنوان المؤلّف : من بلاد العرقسوس

المؤلّف : عبد العزيز بندق

التصنيف : شعر

رقم الإيداع : 26772 – 2018

الترقيم الدولى : 5-7-6656-977 978

عدد الصفحات : 110 صفحة

رقم الإصدار الداخلى: 315 - الطبعة الأولى يناير 2019

تصميم الغلاف : الشاعر محمد الساعي

جميع حقوق الطبع والنشر محفوظة للمؤلف، ولا يحق لأى دار نشر طبع ونشر وتوزيع الكتاب الا بموافقة كتابية وموثقة من المولف





رفصة مزاولة مهنة:58365 - سجل تجاري: - 2017 / 2017 - بطاقة ضريبية: 572-01-572 عضو عامل باتحاد الناشرين المصريين رقم 941 لسنة 2018 (2018 - 020554372901 منية 2010554372901 منية 2010554372901 ماية: alnilwaalfourat ( alnilwaalfourat@gmail.com



#### إهداء

إلى روح أمى التى علمتنى الحروف وإلى روح أبى محمود حسانين بندق وإلى أهلى وعائلتى وأصدقائى بميت الصارم ومصر والوطن العربى وإلى ابنتى لبنى ويسرا عبد العزيز بندق وإلى زوجتى

عبد العزيز بندق

# إعتذار علني .. لجميع كلاب الأرض !!

ياعم " أبنودي " أخوك " سمير " زعلان عشان شتمت الكلاب ــ بالشعر ــ ضرتها هلهلت هدمتها و ف لحظة عريتها طب هاتلي ياصاحبي ضرہ فی یوم حنت

ــ مرة ــ لضرتها ؟ كان ليه يا أبنودي

جرحت نبح الكلاب .. ؟ !

وسيبت اخوك سمره ..

يضرب على الأعتاب

وليه ياأبنودي

بتدوس على ديلها

ودخلت جوه النار ..

معلهش ياسمره

حقك على راسي

دا قناوي صاحبك حبيبك

فبلاش تكون .. قاسي وهو جاني خلاص .. جاب اعتذار مكتوب علشان عيون الكلاب ندمان وناوي يتوب وسلم الرايه .. وراضي بالمكتوب

فالصفح والمغفره ، والعفو ياسمره غلطة .. ومش هتعود ولا يوم .. هاتتكرر أصل الغلط .. مردود من غير .. ما يتبرر

دا حتی اخوك صدام

ندم .. على غلطته

وعض صبع الندم

ورد عن سکته

سمح خلاص تاني

للجنة التقفيش

بالعودة لبلاده

للنهب و التنتيش

\*\*\*

عليك خلاص العوض يا خالق الأكوان وخلاص ياعم سمير بلاش تنام زعلان وانسى وفرفش كده وارمي النكد واضحك وانته يا أبنودي ماتدوسش ع البركان الصلح خير ياولاد وصلوا ع المصطفي وسيبوا كل الكلاب في حالها وانسوها

وبلاش تعيشوا ف قلق لجل القلق .. يختفي وحلوا كل المسائل والأزمه سووها \*\*\*

دا الكلب عام ألفين هايملك العالم والكون على ديله هايُشتري ويتباع وها يبقى له سطوته وهايبقى له .. أتباع مريدين وشلة حرس وفرقعوا ياسباع

\*\*\*

فارجع ياأبنودي عن حملة الهباهيب وعيش في حالك ياشاعر

وبكفياك ألاعيب وإلبس في جلد النمر ونام في ريش النعام وانسى بقى القباقيب

\*\*\*

سموره قلمه صاروخ وكلامه طلق بارود وابدي الأسف والندم وبلاش تعيش ف برود واطلب سماح سمره قول له الغلط مردود

\*\*\*

يمكن يسامحك وينسى ويطيب ياأبنودي ويحل عنك ويكتب لديانا أو دودي وانا لجل حل الخلاف .. كلمت كوفي عنان لجل الوفاق بينكم

والود .. والتحنان وسيبوا خلق الله لجلن نعيش في أمان

\*\*\*

وانا كمان باعتذر لجميع كلاب الأرض علشان في يوم أخطأت .. ومشيت ورا الوسواس شبهت بيهم ناس وللأسف طلعوا .. من زمرة الأنجاس

وانته ياأبنودي ماتقيدش فينا النار أصل إنت مش أدنا ولا حملنا في التار والشعر يووووه .. عندنا .. بنقوله ع القهوه ونقوله في الأتوبيس وف ملعب الكوره ياما جبنا بيه أجوان وطلعنا بيه هاتريك بنبيعه في الدكان ونحزمه بأستيك

وبناكله ويا العيش وبنشربه .. ف ازيار وبنفرده ف لاجران وخرجنا بيه م الجيش مع إني مادخلتوش علشان وحيد أهلي !! لكن .. هلبي الندا لو مره يندهلي ..

فارجع يا ابنودي وملكش دعوه بسمير وان كنت ابنودي

أو حتى جرجاوي سموره هوه کمان شاعر .. دقهلاوي واحنا وراه كلنا .. والشعر لعبتنا نايم في أحضاننا وفوق مخدتنا وفتحنا له مدرسه وبنينا جامعتنا واحنا اللي علمناه للأخ فراهيدي وخدنا فيه اللقب .. باشا .. ولورد .. وبيه

ولو مكدبني ...

إسأل ياأبنودي

عن شعرنا ... سيبويه ..!!

#### طلاسم

الحلم خاصم ملمحك والشوق مفارق مطرحك ومطرّحك شبح السنين وبكيتي لما الدمع دوب جفنك المصلوب على عيونك وفات باب السؤال مفتوح فبلاش تمدي الخطوة بره الدايره وتغني على الأطلال

وطول الجرح والمنفى شوفيلك حل واتحلى وحِلِّيني .. وحلي الخلق ويايا ولفي دماغي بتراب السكك والطين ودقيلي جرس حطين ونادي بصوتك المشروخ صلاح الدين ــ وعنتر والزناتي خليفة والشاطر حسن

دقي الطبول ..

واتمضمضي ..

من دم ابویا ــ

وجدي وتراب دنشواي ..

والمدبحة وبحر البقر

واتبشنقي بزلزال يتيم ..

عشش ف دوخة بنتك البكرية

في المحراب ورعب النخلة

والزيتونة والتوتة ــ

وجنى القطن من شعرك

ولمي الدم م السكة ورديني ..

جواب مسحور ـ

يحل الطلسم الباهت يام الولاد المشنوقين على رمش أعتاب الهلال طول ما الودان متقفله .. وبينقتل صوت الحلال .. ملوش لزوم .. يدن بلال .. !!

### ضل النواصي ..

معجون في ضِل النواصي . وف بحِّة العصافير والشمس كانت في المِحَنْ ضِلي نزفتني أحلام البنات فوق المحن بنايات وحروف بتغزل م الهوى سرجي أركب مهور السكك واخطف سبع حواديت واقراني في كتاب البيان

\*CT>

بين الجمل .. فاصله أو نقطه واقعه ف بطن نون الكون ترميني ودني ف حضن شباكي يخطفني وش الحليب . ويهدني الخمري فرميت عيوني ف سكة الآتي ومسحت ف إزازي وقريت " يس " مليون وكسرت عكازي .. !!

# شواشي الدُّرَه ..

باعلن سكاتي ع الخصام المر وقت ارتياح الرماح واركب ضجيج الوطن مع شمس نور الصباح وارجع بقلبي .. للي كانت بتطلع ... فوق شواشي الدره لجلن تعلمني الكلام وازاي أكون الطوفان

**\*** 23 > +

واشرب هديل الحمام ــ فرَشِت همومي سفر .. نشرت دموعي ع الشجر أحلام والليل بيشرب بسمتي أحزان .... وقعـت حروف الهجاء تحت السما السابعه تمسح رتوش الصور وتلم سرب اليمام .. !!

غنت " نجاة الصغيرة "

بظروفها " لا تكذبي " !!

على كفي نام القمر والشمس شربت ملح من جرحي صلى الهوان جنب الألم ركعه فضفض بسره للسما التلاتين نز الهوى عصافير بترقص فرحتي ضله مفطومه ع اللحن الجديد هربت ــ من الشط ــ العيون وسمعت بح الحنجره

والبحر تاه ..

عكس اتجاه .. الريح

ضلت صوابعه

العد والتسبيح ...

ماعرفش لون الموج .. !!

ومنين يكون الدخول ..

ومنين يكون الخروج .. !!

# دايره .. من الزيت البدائي ..

من بين ضلوع البحر طالع للخلا ماسك في إيدي الأسئله لافف نواصي الشعر بالشاش النحاس .. ومذاكر السبعه العجاف وقفت على قلبي المداين تبتسم تنظر عصافير الجناين ..

**\*** 27 > +

ترسم الأصوات خجل وتلم صوت المسروقين

ساعة الأدان

" الله أكبر "

بركان سنين

عمر الهوان

المختبىء

جوه " الفريزر "

داخل أنابيب اختبار ..

نیکوتین سجایر کلیوباترا ـ

ــ وشوش بلاستيك ،

أنتيكات

وبروكسيمول

وعيال من الطين الحرير ..

جرکن خشب

على ناصية الأيام

نقط شرعت تسابيح الوجل

ضرب البروجي الصفارات ..

لم القلوب

الصفراوية وحطها

ف برمیل مجلفن .. ،

والعيون الزايغه

جوه اکیاس حدید ..

والمفينيكول ..

وازازه م الزيت البدائي ..

سرير معقم ..

نخلتين

" مادلين طبر " ..

" عادل إمام " ..

ديانا دودي

أووووول .. برايت ..

طشت العجين ..

شطين صفيح

تصريح دخول الجنة ..

صك المغفرة

أبدان من الزمن الأليف ...

تستيف ورق

أستك حزام

كراتين قماش ..

غشاش ..

نبي

وقعت نجوم الأجوبه ..

حرقت مواجير العصير ،

نبض السكك والمفردات

عبيت في جيبي القلعة ــ

رمسيس ــ الفنار

وشلت كوبري أبو العلا

والنيل وكل الأهرامات ،

والجامع الأزهر .. على كتافي وماسك في الإيدين .. كل اللي باقي من تراث الأنبيا ودخلت جوه الغار بعيدا عن مخالب الأخطبوط قرفصت ساكت جوه دایره من الشفق

مستني

تنسيج الخيوط

لكن .....

ماجاش العنكبوت

( أشعار )

### مفترق الطرق ..

على قرب مفترق الطرق .. والدنيا واقفه برجل واحدة ع الطوفان .. الأخ بيتاجر ف أخوه والإبن يهرب من أبوه أو يقتل امه وهيه بتأدي الصلا والكل جاوب في الدماغ الأسئله

خوفا من الليل الكابوس والكون جاسوس .. واتغيرت كل الوشوش ومفيش نفوس بتبص إلا .. للأنا زعق المجوس دارت رحاية الحرب بین أشباه بشر .. ومابین هموش ، ومابین بقر ، ومابين تيوس .. مبيفهموش

ملعون حيائي ..

الأمر في دماغي اختلط .. !!

ملعون ذكائي ..

عشان فهمت

الناس غلط .. !!

في الدرس

ماقبل الأخير ....

مديت إيديه ..

وخدت إيد الألعوبان

وزرعت بذرة حب

في أرض الجبان

ورميت حناني

للكلاب السعرانين ..

واما وصلنا المفترق ..

سهونی .. حاولوا

يعضوا إيدي-

الممدوده لْهُم

بالتسامح والحنان

والسكه واقفه ..

تردني

... وخدت بإيدي

الدنيا تاني .. تمدني

بالحب جوه الكوبايات

وتشدني نحو السكات

وانا قالع الأيام على الأسفلت ومعري البدن عاطي الأمان وبنفض العقل الغبي في دماغ حمار ومخاصم الأحبار ومتحزم ورق .. باطلب عناوين السمك من صفحة البحر اللي مات جوه الغرق وارسم على الأحلام

ميدان الست

والسكه الحديد ...

براويز إزاز

على كوبري طلخا

وجوه شارع بور سعید

وف میت حدر ..

والمختلط

وانقش على

حيطان الحواري ....

" أم كلثوم " الفتيه ..

واسمي لما بيتسرق ......

وبنتي لما تقول يابابا

أعمل لي مركب م الورق وانسى الكلاب وارمي قراطيس العرق وارمي المآس وسرة الخير الكتير في البحر وإياك الندم وارمي الهوان مطرح ما بيدوس القدم وامشي ف طريقك وابتسم واياك تبص ف يوم وراك واطبع على

الأرض الخراب البصمه تطرح تاني عمرك م العدم واجمع حروف اسمك وحاول رصها من تاني صح إدفع سنين عمرك وحاول تشتري الأرض الخصيب وانسى الفتن وانسى الخسيس وانسى القرود

وانسى الخنازير .. العطب وانسى الخلل وانسى المعيب ولا تعترفش بالنصيب وارمي الزمن لو كان .... عصيب والدنيا ع الحال ده .. وده ساعات تزمجر بالعواصف والرياح وساعات تطيب وساعات نشانك يعصى إيدك

وساعات يصيب وساعات يحبك مين عداك .. !! وسنين يخونك .. اللي خدته ف يوم حبيب .. !! أتاريها فاهمه الدنيا صح .. " الفين صلاة على النبي " وانا كل يوم باطلع .. غبي أرفع بإيدي الواطي فوق .. واعطي الخسيس مفاتيح شروق

واعمل ـ طحينه البحر

والمر ..

العسل .. !!

والآخر آخد میت خازوق وکأنها نیاشین

على حيطان الأوض .. !!

لكن .....

على الله العوض .. !! وساعتها بس

عرفت إني اكبر غبي وعرفت إن الفرق

بيني وبين كراسي الأنتريه حبة عيال ودماغ خشب ومفصلات ع الوسط تفتح للهوا ... .. وعرفت أن الفرق بيني وبين ولاد الكلب زيف ، وضمير صحيح مزروع بإيد الأب جوه دماغ زلط کان ذنب مقدرش أغفره ـ ... والفرق بيني وبين

وكيل الرقصات ....

كان شىك ملاك ..

وسرير محمد ابن صالح ... والبلح

وفلوس جمال ..

واستسقا عادل

.. واختلاس

... والفرق بيني وبيني

اني لحد بكره ماخنتنيش

وقدرت أعيش ..

علی طهر ابویا

وطيبة أمي ونشأتي

ومهمنيش زعل الكلاب من وقفتي ضد الطوفان مع كل من خالف هواهم وانفصل ومهمنیش من ناظر الوقف الحمار ومهزنيش زحف التتار .. على مسجد النصر ف صلاة الفجر والناس ميته ومردنيش عن ديني جوز الست والحاج الجبان ولا موت

" محمد سيد احمد " بالواير ولا قاعدة المخصى على القصريه داخل کوم ورق ومحوَّطاه خواذيق رصاص .. وكلام كتير مفهمش منه / الا إنه يردده .. برهانه على جلده النتن وماهمنيش من درس حاوي السيرك في المولد

.. بلياتشو لم عيال حارتنا الضهر الاحمر ولا لحاسين فخد النسا ساعة آذان الضهر في الزنقة ولا من أخينا أبو كتف مايل زي محرات اليتامي .. في بلدنا أم جناح خشب ولا من دواليب الحرس أدام مواكب أمنا الغوله ولا من بناديل الساعات

الهباشين مال النبي .. ولا مصاصين الدم من وش النهار ولا بياعين الدوشه أو من كدابين الزفه ساعة خرجة الميت كفن تجار دقيق الرُّبْعه مِنُّه بِقِرش صاغ ولا خفت من شبكة خيوط العنكبوت اللافه حوالين المسيخ الدجالين في السجده

وف ساعة الركوع ولاخفت مرة من الغرق ولا خفت غير من أبويا لما يبصلي بصة قلق ومن أمي لما تبصلي وما تبصليش .. !! مع اني واقف فوق طوفان الغدر جوه الزندقه ومصدّر المخ الحجر نحو التيران ميهمنيش

من قلبي ساعة مااختلف ويايا من وَزِّة شيطان علشان أمين في خصامه من ضلعي اتولد .. ومهمنيش من ناس کتیر ولا خفت إلا م الضمير وولادي لو بصوا لي .. مرَّه وعيطوا تتعلق الروح في السما ومتردليش

وفهمت إن الفرق بینی وبین جروحی / لما تهرب متجنيش والفرق بيني وبينى روحي واني شاعر متحنيش والفرق بيني وبين قصايدي بدونها مش هقدر أعيش والفرق بيني وبينهم إني ... فرد ـ بس ـ کأنه جيش وهوه ده الفرق الوحيد .. بين اللي عاشوا م الحلال وبين اللي عاشوا من الحشيش .. !!

## المدى بدئي

صرخ النزع الأخير لحظة دخول القلب في فلك المخاض وه ساعة انفصال سن القلم عن حبري يزره في المدى ...

ــ وكوني .. واسمي وشريط الطريق المدى .. بدىء .. !!



ساعة انغماس سن القلم في الحبر يعلن في المدى بدىء يتفجر الكون اللي نام على كف إيدي بيوت من الشعر الرصاص والصفحة تبعت ضيها بركان حروف متسلط ف رقابكم نار وتزلزل الأرض الغبيه النايمه تحت اقدامكم ساكنه مسلمه

ــ للدود جذورها وتبتسم والدود ردود الفعل من نوم الغبي وانا متخلقتش زیکم .. انا متخلقتش م التراب ولا من ضلوع آدم ولا .. ــ من نار غباءكوا وغلكم ولا باعترف .. إني ابن حوا ولا ابن طلق الصبح أو بخة شيطان ولا من ضلوع الأوليا ولا جدي كان م الأنبيا

أنا رؤيا هايمه في النفوس لا ركعت مره للفلوس ولايوم سجدت للدولار أو للنسا ولا کان مکان قلبی حجر أنا مش هموت ولا يوم ههتم للسكوت اللي اترسم على وشكم انا متخلقتش زيكم لاف يوم دفنت ف رملكم وش ولا .. غيرت صكي

اللي اتختم بالنسر فوق الجلد أو خنت التراب ولا يوم زعقت ف وشكم زعق الغراب ولا حزمتني الرقصات في ملهي ليلي ونمت فوق الأرصفه ــ سکران يهزه وسط فاجره مرخصه ولا يوم رضيت أبقى الشيطان

لاخرس ولا ..

كلب الحراسه

لكلب من

صلب الكلاب ..!!

أنا متخلقتش

..... زيكم ... !!

ولا جلدي شايل وشمكم .. !!

### لأ

لو انتم صح مش ھانطق في يوم اللقا ولا مره هلألأ بعد لاءتكم ... بآه أو لأ ولا هتخش آهاتكم في عقلي ... زق ولا هابحث في يوم صحة خبر .. قلتوه ولا هانطق في يوم اللأ .. لو قلتم في وش لأ ..

# " جناس .. ناقص "

منیش کائن في دنيتكم هاعيش مقموع ولا خايف على كرسي في سلطتكم ولا م الجوع ولا مشتاق إلى الآتي .. ولا ھابكي على المخلوع

من بلاد العرقسوس ( أشعار )

أنا كفايه ..

عليًّا عشت في رحابكم

سنين مخدوع

وقلبي ضج

مش ناقص

جناسكم

التام أو الناقص

ولو کونکم هو کوني ..

أنا رافض لهذا الكون

ورافض كونكوا

وجنانكوا ..

وما سيكون .. !!

## من كام سنة ؟!

من کام سنه دایر ياعقرب الساعه لفيت في كل السواقي باليوم وبالساعه لاخرجت من دايرتك ولانمت لك ساعه ولاشفت فين سكتك ولاصرت يوم ... ساعه .. !! أنا قلبي كان إنتماء وفضلت أقول وطني

طلعوا القضاه مشنقة والجلادين .. وطني عجبي عليك ياوطن ساكت ولابتبوح الدمع نازل دم تبكي .. وانا المجروح

### صوت مشروخ

إفرد قلوعك ــ وارمي للريح القوارب والشراع سيب السما تلم البراكين والزلازل ... وابتسم لا الليل هيقدر يتني وعـدك ولا حتى يمكن للنهار لحظة صفاؤه ...



يسعدك

إلا إذا كنت الوحيد

بين الخلايق

رامي الحمول

ع اللي خلق

يا قلبي آه :

أنا الوحيد

صوتي اتشرخ

من كتر صد الريح

.. صریح

وانا اللي لميت المآسي

ف جعبتي يوم السفر

وحرصت جدا

إني اكون

إنسان وبس

رافض يشوف الغيب

ورافض ينحني

لكل الضغوط

رافض كمان الإعتراض

... على حكمته

مخلوق أنا

إنسان وبس

ماقدرش أكون

خالق عشان :

هوه الوحيد خلق البشر والكون وكل المخلوقات

... وبقدرته

علام غيوب

وإله قلوب

فتح البيبان

للي عصاه

لجلن .. يتوب .. !!

#### نون

العين: عمل ..

عهد وعرق

والجيم: جبان

اللي اتشنق

أو عاش ذليل

والنون : ندم

والطاء : طريق

اللي اتعـدم

العين :

عليه صلى الإله

وعليه جميعا صلوا

قوموا وسلموا

العين : علام

بيعلم الإنسان ..

ماكان يوم يجهله

العين : ياعين

عيني عليه

اللي اتظلم

ومالوش عيون

تنظر تحوش ..

غـدر الوحوش

أو حتى

تمسك له القلم

العين : عيون

سهرانه تبكي

من الفراق

وعيون بكت

من خشية

الواحد ندم

وعيون بتحرس

في سبيله وتبتسم

العين : عدوك .. فاحذره

العين :

" عطيه الإرهابية "

#### العين

على باب الوزير

العين أساس العدل

والعدل اختفى

والجيم : جفا

والنون: نيران طايحه -

ف ضمير كل البشر

والطاء: طفا ـ

ع الوش زيف

زاد وانتشر

العين : عزيز قوم ارحموه

لو مره ذل !!

العين: عماد الدين صلاه

العين : عباد

بيوحدوه وبيعبدوه

وعيون عفيه بتشكره

وعيون ... علل ..

العين: عماد عمار

الدنيا لو فيها الضمير

وعيون عذاب الآخره

والنار السعير

العين : عزيزه

وعزة النفس العـفاف

وعيون بتكره

يوم تشوف

عين العـوج

وعيون تخاف

وعيون شرود

سرحان تأمل بغـدده

وعيون تموت في العربده

العين : عصب ..

العين : عتاب

العين : علوم

وعيون عمم متعممه

وعيون تشوف ..

وعيون تلوم

وعيون معصبها العـمى .. !

العين :

على الله العوض ..!!

### زمان مقـلوب

يازمان مقـلوب

ياقـلوب .. ياشعـوب

ياجروح

رقْص الطير ..

مش علشان

فرحان مبسوط ..

علشان ... مدبوح .. !!

#### فلسفة

حبيت أفلسف عشقي ليكي فلسفه طلع الكلام مني .. سفه ياشعب يانايم فى العسل إصحى وصحصح م الكسل

## ضحك البنفسج

عـدِّيت على لقمان - جريح الحزن -غىر ملمحُه ومطرَّحه تراب السفر بصِّيت بجرحي .. هـزِّني حزن البنفسج وانعـدام الوزن فـوق كف الضباب دوَّرت عـقـلي ف ساقية التفكير

وشدَّيت الرُّباط خيِّم عَليًّا الحزن والإحباط -ومرجحني الشعـور ــ ورماني للماضي اللي ماضي في السراب .. والخوف ودقـات الطبول اللي في شوارع الشعـر القـديم كشّت مشاعري اتبخرت أحلامي

فـوق المبخره زي الوضوح مايروح ينام جوه انعـدام الدم ــ ويضم العـدم في الخوف وخـوف النفس كان هـوه السند والمستند زيف الحقيقه يلف خيط الذاكره فوق البكر فرجعت بالعـقـل لورا ..

لما المباخر بخرت حلم اللي خاف تاهت خطاه ف التوهه تاهت سکته لفّيت عليه .. لا رجعت بيه .. ولا سبته زي ماكان و لا .. هوه افتكر غـمست دم الليل برمشى والسنين القرمزي

دخلت بلاد الصمت والنور اتربط ــ على جذع صفصافه حزمت كل حروفي في حلق الكلام .. واتمرجح التفكير علی کرسي الهواجس والظنون اتمكنت مني الشجون !! والحزن شد الحيل وعـدى المستحيل ولجل ماخْرُج

م الكآبه بخطوتي المتحجره رُحت اشتریت بجنيه بشاشه وزغـزغه ورميت على الليل التَّماسي بالتِماسي وقوتي ... والضحكه مركونه ف رفوف المكتبه .. وشحتت م الليل

ابتسامه مزيفه وسألته مين ياليل حزین کان حَـزّنَـكْ .. ؟ رد السؤال بجوابه قال : طب قوللي إيه انت اللي كان يوم فَـرَّحَك ..؟! والحُزن قاعـد فوق كتافك طرحك وانت .. كما زهـر البنفسج مَـطْـرَحَـكْ رديت وقـلت ياليل حزين أنا شاري بجنيه زغـزغه

كان الجواب :

هـتدوب ف بطن الحزن

مش هتلاقي فوق الشفه ــ

طيف ابتسامه

ساعة ماتدخل

جوہ نفسك

طیر جریح

ويلف فَـرْحَـكْ

عـنكبوت الحزن

ويدوب الفَـرَح

ويمر معك حزنك

في يأسك مرمغه

هتتوه ف زحمة جرحك المفتوح وتدخل ف التساؤل وتلف دنيا الزيف حجر داير وفاير ف الكابوس وتدوس .. برجليك الحفاه فوق المسامير والإبر وتغوص ف بحر الشعـر وتـلف الرَّحي تنده سنينك بالآهات تفرش جروحك من جروحك

تقطف النجم اليتيم تعـتيم وغـيم تركب حصان الولوله .. يصهل جديد ويلف بيك الريح مواويل الأسى والبوم يحوم حواليك مشبِّك في الوريد ويبخـرك فـوق جمر نار المستحيل ويطلعـك فوق .. إنما ... شىء مستحيل ...

هيوصلك يوم للسما ..!!

# أدهم مدرس فلسفه

مين اللي يقدر يوم يمحي جبال الهم يرفع رقاب القـوم ويكون كما أدهم يحرر الكلمه ويصون بني الإنسان وينور الضلمه ينطق بألف لسان ويرجع اللمه

زي الصحابه زمان يلحس تراب الأرض يرفع لوا الأوطان ..!! مليون خساره عليك ياولْـد شرقاوي لمَّا التراب يتاويك وانت اللي كان غاوي تاخد بتار أهاليك يادهم ياشرقاوي إنت الزمن والزمن عاشق حروف إسمك وه ف قلوب البشر

منقوش كما رسْمك والكل غـنوا بيك كل العـدا وأهاليك وانتو كمان غـنوا : أدهم ولد فارس للأرض كان حارس حافـظ ترابها صم كان زي صوت البرق كالسهم يمرُق مرق مش لجل خال ولا عم مين اللي زيُّه مين ؟! سهران بقالوا سنين

يغـلى ف عـروقه الدم مصري ودمُّه حـر يشرب ويسقي المُـر لجل الجميع يتـلم ويكونوا إيد واحده ومفيش نفـوس جاحده ويزيحـوا تل الهـم فـوقـوا ياناس فـوقـوا قـومـوا إشربـوا ودوقـوا من مُـرّ كاس لادهم طول عمرہ کان بیقول بلسان فصيح القول

واضح ومش مبهم يحرم عليه النوم طول ما العـدا بيننا لاوييين رقياب القيوم وبينهبوا مننا ياناس ياعيب الشوم لو يوم ننام نِـنَّه ونسيب كلاب تـنهش في عرضنا وديننا وَصَل العِـدا صيته إتجننوا منه راحوا لباب بيته

قال يسألوا عنه فتح البيبان ليهم إستهونوا بسنه أخضر صغير السن هيخافوا ليه منه يشبه حمام البِـن هيقولوا إيه عـنه ــ عيل ... وطفل رضيع بيقول كلام ويبيع وميعرفوش إنه جسمه حدید مصهور الدم فيه بيفور

والنيل شرب منه رد بشرار ف عنیه ياخواجه جايني ليه رد بحقاره علیه إخرس .. يا إبن الإيه لادهم رفع إيده قبضوا ف ثواني عليه وخدوه إلى المعتقل والسلسله ف إيديه جنوا جنون الولد زعَّـق وصاح فيهم والعـزم فيه اتولد

والفكر دار جواه والصبر فيه انجلد وف وشهم .. قال لهم : لازم أخليكم زي الديدان في الأرض والطين يتاويكم جلدوه سبع جلدات ورموه ف زنزانه زعق وطاح فيهم قالوا ياواد .. إخرس

قالوهـا لُه : Shut your mouth قال الولد أهرب

واكسر قيود الأسر واخرج وطيح فيهم كما كان يطيح النسر حطم جدار سجنهم أصبح طليق ف البلد وهـروبه جننهم ماشي ف طريقه افتكر قول الكلاب : اخرس عملت صدی جواه قالوا الكلاب إخرس !! والدم فار قـوَّاه

قالوها لي : !!Shut your mouth

شطيت ورحت وجيت يحرم عليه ال house يحرم عـليًّا البيت مصر الوطن بيتي ومخدتي وغيطي دا المصري ذاع الصيت من شيبته لطفولته معروف مابين البشر بشهامته ورجولته وازاي كلاب في البلد يتحكموا فينا والحر ليه يتجلد

والكلب يـدِّينا من فضل خير البلد اللي صحيح لينا ويعذبوا ناسنا ويدوسوا أهالينا ويقولوا shut your mouth نخرس وكيف نخرس دا الحر لو يتخرس يبقى الهوان أرخص دا قالولي shut your mouth

شطيت ورحت بعيد

شمعت باب ال house ونسيت قدوم العيد عقلي شطح مني جوه البلد واسأل أفتح كتاب الزمن ولا التاريخ اسهل وسمعت صوت اتخنق ع البعد ف وداني اللي يخون يتشنق في التو يااخواني فـتَّحت عيني أشوف شافت عيوني العجب

على جسر مرمي الشوف رمضان وجانا ف رجب لادهم وقف ع الملأ يزعق بصوته يقول : ياناس أنا لادهم اللي انتهى مقتول ياناس انا لادهم شقيت جدار الصمت واضح ومش مبهم جوه العواصف عومت دوَّخت كل السكك هـدِّيت ف أوصالها

سردبت ليل الطرق خندقت في اوصالها فلا صابني سهم العدا ولا نالوا مني الجان سهرت عين المدى أعزف نغم الحان عليت حصون الفدا وقعت بإيد .. بدران صاحبي وكان جاحد مطمرش فيه العيش خاین ومن یومه تعلب ولابس ريش

خوَّان عشق دمي صدقته من همي فكرته ابن أمي كفـنِّي يوم العيد فكرته كان صدِّيق هدهدت له روحي بحبحت ساعة ضيق فحَّـر لي ف جروحي علقملي طعم الريق يامايه لا تنوحي ولا تكتبيني طريق ولا تشتكي منه

ولا تكتبي خيانته بالدم من جسمي ولا تنقشي إسمه يامايه جار إسمى ولا تحكي لاهل البلد عن مين مسح رسمي نملايه يامه افترت بلعت بزلومه غدرت وخانتنى قتلتني بالشومه باعوا تراب النيل متقومي .. ياحكومه

الحق ضاع في البلد بحكايه مزعومه أصلي ومن يومي فارس أنا خيَّال رغم الخيانه أنا منقول مع الأجيال فارس ومن يومي داخوا العدا مني هدیت حصونهم هد لفوا البلد عني عدوا الحواري عد أصلي ومن يومي

فارس وقلبي حجر بس اما خان بدران القلب فيًّا انشطر صاحبي وكان خـوَّان دم الخيانه قـذر دم الخيانه نزيف موصول بحبل العـطـش زى الحريق الصيف مليان يابحر الوجع مدبوح بسن السيف قطع الكلام لادهم واتحجرت دمْـعَـه

بين الجـفـون والعـين وكأنها سامعه صوت جَـىّ من جُـوَّاه واتطفت الشمعه إنطق يالادهم قول: مين اللي خانك مين ؟ قال الصديق السوء يقتل في ضي العين منقوش على بخوره دم الكلام الزور مربوط ف طرطوره عرض الصبايا الحور

مکتوب علی سطوره صوت الجحود والجور من دهشة اللي حصل قيِّلت عـقـلي ونام لفيته في الجمجمه مكسور كما الأيتام أدهم أنا المخدوع لو أعرف الخدعه فضَّلت أموت م الجوع ولا إني أكون بدعه يتغـنوا بيها الناس جوه المدن والقرى

جوا .. الكفور ونجوع كمَّل يالادهم قول للكل إيه حكمتك قال الجدع مهموم شايل أسى بالكوم ماقدرش جيش العـدا ولا حتى قدروا الجان يحنوا بدن لادهم لكن .. قدر بدران ..!! وعجبي..!!

#### محتوى الكتاب

2	بطاقة الكتاب
	إهداء
4	إعتذار علنى لكل كلاب الأرض
	طلاسم
	ضل النواصى
	شواشى الدره
	دایره من الزیت البدائی
	مفترق الطرق
	المدى بدئى
	¥
	جناس ناقص
	من کام سنه
	صُوت مشروخ
	· نوننوننون
	زمان مقلوب
	فلسفه
	ضحك البنفسج
	أدهم مدرس فلسفه
	محتوى الكتاب
	÷—- 05—-